

晚晴移詩匯

晚晴綫詩匯卷二十八目錄

錢陸燦 二首

計東 五首

吳兆騫 九首

王雲明 一首

魏力仁 一首

張樞 二首

李珪 一首

任繩隗 六首

李天馥 十七首

熊賜履 六首

陳廷敬 十三首

杜臻 二首

屠粹忠 四首

鄭重 一首

魏雙鳳 一首

趙崙 二首

陳肇昌 一首

張貞生 一首

王遵訓 二首

蕭惟豫 四首

杜鎮 一首

王曰高 二首

于漣 一首

戴王縉 一首

劉果 三首

高暉 二首

吳淇 三首

林雲銘 五首

羅孫耀 二首

張一鵠 三首

侯體隨 一首

鄒祇謨 六首

魯紹連 二首

晚晴移詩匯卷二十八

徐世昌

錢陸燦字爾孜號湘靈常熟人順治丁酉舉人

沈歸愚曰湘靈爲牧齋族子其詩不爲虞山派所縛別調獨擘夏夏自異毗陵學詩者多宗之

與袁穉庵唐祖命方爾止張瑤星余淡心黃俞邵諸

君子集牡丹花下

前歲花時渡江去去歲吳門三月暮三度花開一度看今年恰在金陵住金陵舊是帝王都歲歲花開如畫圖此花又殿春風後朱衣王謝相傳呼一筵釀費中人產一花千人萬人眼金盤綵籃共貽贈招邀名士分折柬永和蘭亭金谷園月落檀板催金尊百尺烏絲長到地情辭豔句爭飛翻得所穠花易消歇子規啼血栖宮闕無復天彭百馱

花王孫五勝埋香國花殘人散可憐春十處園林九處塵
欲往城南訪耆舊酒徒零落空芳辰太史園中花百種紅
敲綠捧花頭重花神有意洗妝遲要勒詞頭固君寵諸公
同日看花來鄧生酒甕還重開廿年無此好事者無詩不
飲那能回酒醉詩成花欲語明歲花開待予汝春雨春風
作主人鸞飄鳳泊同羈旅

金陵柳枝詞

柳絲嬈嬈復蕭蕭三月秦淮舊板橋北里燒殘人又嫁不
須風雨也無聊

計東字甫草號改亭吳江人順治丁酉舉人有改亭集

詩語甫草從汪茗女游又謁湯潛庵講程朱之學以
經世自負過邾下拜謝茂秦墓傾藁金爲修葺題詩
而去沈歸愚論詩絕句有云眇目山人足性靈詩盟
寒後苦飄零後來誰弔荒墳者只有吳江計改亭

豫讓橋

秋盡蓬山慘不驕，流泉夾岸夕陽遙。
傷心國土酬恩地，瘦馬單衫豫讓橋。

宣府中元夜卽事

邊月新秋夜，哀音四面齊。
戰場多舊鬼，野祭有遺黎。
柝亂愁人聽，風驚倦鳥棲。
遙遙天漢上，河鼓漸垂西。

宣府逢立秋

秋氣吾所愛，邊城太早寒。
披裘三伏慣，擁被五更殘。
風自長城落，天連大漠寬。
摩霄羨鷹隼，健翮爾飛搏。

鄴城弔謝茂秦山人

鄴中懷古正秋風，詞賦深慚謝氏工。
生欲移家辭白雪，沒隨疑冢對青楓。
諸王禮數何常絕，七子交期竟不終。
自是

貴游無遠識布衣未必歎飄蓬

答雲間蔣馭閣

西陵原上憶經過
屈首從君學九歌
豈意邊書警御宿
遂令複壁老山阿
破家張儉飄零久
質保王成辛苦多
今夕相逢還道故
數聲鶴唳起庭柯

吳兆騫字漢槎吳江人順治丁酉舉人有秋笳集

詩話漢槎意氣傲岸不可一世卒以是賈禍詩爲健
菴漁洋所稱許驚才絕艷冠其儕偶梅村目迎陵漢
槎及華亭彭師度爲三鳳凰出塞後詩境沈雄得朔
方蒼莽之氣少工駢體其長白山賦足摩班張之壘

榆關老翁行

榆關酒樓臨大衢
征人日暮行駐車
鹿裘老翁鬢成雪
夾轂相逢問里閭
乍聞吳語三太息
坐我樓頭話疇昔
自云家世本吳中
住近張王舊官側
少年追逐冶游場
破產徵

歌意無惜沙家槍稍冠江南學得梨花推第一技成好作
關河游販繪幾度來邊州燕姬十五芙蓉色彈箏夜夜酣
高樓一曲紅綃醉中擲囊空典卻千金裘三載邊庭履霜
露飄搖短褐誰相顧途窮不忍到鄉關卻向軍中應征募
金鞬翠眊繡螯弧名隸渡遼第三部關前上將霍將軍遣
向松山守烽住孤城接關無時休鐵甲中宵帶冰卧老邊
牆直長城隈梯衝百道如山來甯前列屯晝城閉旌旗黯
慘紛黃埃雄邊健兒十三萬鼓聲欲死弓難開磧西降丁
最翹健日暮分營夜催戰吁嗟萬騎無人回射盡平州鐵
絲箭曙光瞳瞳海生綠戰血無聲注空谷嚴霜如刀箭如
蝟欲上戎鞍淚交續堅城旣墮將軍降幾部殘兵向南哭
相隨散卒臨渝城橫刀更隸龍驤營倏忽長安易朝市關

門不用防秋兵從此飄零脫軍伍種豆鋤葵學農圃且將
衰齒託雞豚幸免微軀飼豺虎去年有客來燕京傳道江
南亦被兵故國他鄉盡荆棘窮黎何處還聊生伊昔姑蘇
城畔住門前小店臨江樹半生羈戍塞垣秋夢斷吳關舊
行處今日逢君遼水北被褐驅車欲安適白頭邊語久侏
儻重聽鄉音涕橫臆悽惶嶺外北風哀莽莽邊沙路何極
沽酒邀君君莫辭天涯相見且相悲莫嫌憔悴窮邊叟猶
是吳趨市上兒

同諸公登中後所戍樓

若爲荒戍駐征輅縱目烽樓野色遙萬里川原迷大漠百
年亭堠識前朝平沙暮捲山頭樹落日晴翻海上潮倚堞
卻尋南首路漢關迢遞已雲霄

同陳子長坐氈帳中話吳門舊游愴然作歌

遼城四月春風來黃鸝唳樹梨花開陳生邀我郭南去笑
騎鞍馬雙徘徊沙場黯黯日將暮半醉歸來解鞍卧氈牆
誰撥鷓鴣絃彈作商聲淚交墮憶昨故鄉百不憂命傳嘯
侶吳趨游裁詩每題白團扇縱酒欲賭青羔裘沙棠之槃
雲母舟美人玉袖搗箜篌金窗銀燭月未午清歌窈窕無
時休就中少年三五輩徐郎顧子稱風流孤側帽傾土
女正平搖筆凌王侯百年行樂竟誰在淒涼邊地傷離愁
只今相對休悒悒人生苦樂猶迴掌隴西將軍困醉尉邯
鄲才人辱廝養古來憔悴多名流吾輩何悲棄榛莽君纔
弱冠我盛年可憐淪落俱冰天舊游一別已如雨陰關萬
里徒含煙寄哀欲託庾信賦賞音空憶鍾期絃金樽有酒

且沈醉何須惆悵風塵前

海郎山靈湫神女歌

山頂有公
主臺遺址

海郎山色倚巉巖山半靈湫映曉嵐公主舊臺餘翠岫神
女新祠傍綠潭神女嬋娟豔瑤彩霏煙曳月迷年載怨入
青蛾憶漢宮魂依白鶴長遼海含睇凝情不可親乘風颯
颯如有人虛無瓊珮空山雨杳渺鸞驂絕島雲和親當日
悲登隴遺恨千秋塵瀆洞寶鏡何時別紫閣玉衣無處尋
青冢松花檉葉小祠荒總帳無人春日長鴉翅髮垂宮樣
髻虎章腰結羽人妝香粉長筵醉芳醕巫女如花下靈話
踏露時聞石馬嘶騰波自共冰姨舞一曲迎神蘆管愁年
年賽火海東頭望鄉莫更歌黃鶴紅粉魂歸塞雨秋

早秋陪諸公游密將山

招邀出郭門青山殊未已金鞍小騎何連翩人影遙遙翠
微裏翠微一望延層巒深松伏澗相風湍飛泉半挂銀河
殘秋嵐散入芙蓉寒石門黯黯金花裂隔溪蒼翠時明滅
回風絕壁森晝陰六月空濛見殘雪西峯百尺寒崔嵬振
衣欲上觀蓬萊黃雲泱泱動海色樓船射鮫安在哉松花
江水流浩浩千秋戰骨關山道龍堆狼望空嗟我飛將勳
名歸蔓草昨夜秋風吹塞天臨潢萬樹生寒煙金笳玉笛
起愁思邊心四據空茫然安得仙槎泛清淺乘流直度支
機前壯士無家誰不憐李陵已向陰沙沒逢萌空稅遼東
田君不見徽宗埋骨空江曲遺冢蒼茫走麋鹿徽宗冢在
五國城西
良岳風流亦一時黃沙玉柳無人哭萬乘飄零且復然吾
生那更悲窮谷擊筑高歌出塞辭何如楚客吹參差眼前

有酒且不飲迢遙漫作鄉關思紫駟嚼嚙當風嘶爲君重
進金屈卮醉卧青山且莫歸明朝秋雪吹人衣

送人歸遼東

送爾驅征馬離亭葉已飛雲山三歲別風雨一人歸磧晚
黃羊少關寒白雁稀蒼茫望遼海今日是王畿

游西山蘭若二十韻

四禪分浩劫雙樹啟香津地湧龍沙古宮開鹿苑新寶鈴
流塞雨金刹照邊春窈窕丹檻合峻嶒碧嶂鄰下堂鐘送
客歸院樹迎人仙梵消兵氣天花灑戰塵瀑泉墮月曉山
磬靜霜晨咒食聞禽下繙經見虎馴果肥風破甲松勁雪
生鱗座凝逢師子林應集雁臣南宗壇卓錫西竺字函銀
香散冰天畔僧歸沙海濱嘯聲疑藥老碑製想王巾共道

城爲化誰憐里是貧白毫徒彷彿阜帽自逡巡已昧生還
日空悲老去身神人甯夢漢逐客未歸秦涕淚瞻慈像飯
依請梵輪祇林誰抖擻朔野此沈淪何日吳中寺長齋禮
應眞

置酒歌

臨潢城頭暮吹笛北斗闌干月將出金吾置酒坐北堂銀
鞍召客何輝煌織成罽幙芙蓉捲紫氍新茵獸文輒黃羊
作饌堆金盤青驪桐酒揮犀椀筵前火照明星稀疑筵急
管紛相依錦衣如霧聲絳蔡寶刀拂露光霏微須臾月東
吐留賓坐撾鼓還塞丹綺帷更出紅妝女金鈿躍紫貂珠
珪襲青鼠的皜芳脣歌便娟細腰舞沈沈芳夜闌惻惻北
風彈青蛾扇底蹙素指絃上寒哀絃聲屢闕靈蚪水頻咽

但願羅袖歡詎惜珠纓絕酒闌華幕坐欲移徘徊落月秋
河低錦燈車馬縱橫去應照香塵繞路飛

白頭宮女行

長安女尼妙音者本崇禎時舊宮人後
出居民間祝髮於北城之佛舍與海昌
相國居址接近嘗出入相國家述甲申三月及宮
中舊事甚悉又言宮中侍姬都以青紗幕外約釵
梁自遭喪亂香奩寶釧悉為人奪惟存青紗數幅
猶昭陽故物也今年戊子余以謗議械繫都官而
相國亦以他事下吏因與其嗣君直方子長相見
酒酣耳熱為言妙音子既自傷讒枉復聞妙音之
事悲紅粉之飄零感羈人之淪落乃
連綴其詞作為長歌以傳於樂府云

長安女冠頭似雪曳地黃紘懸百結手執金經淚暗垂云

是前朝舊宮妾一朝充選入披香倭墮新梳內殿妝低鬢

自惜青蟲小繫臂愁看絳縷長當年御極方情晏宮中屢

啟催花宴雲母屏開見舞人水晶簾捲低歌扇歌舞年年

樂事殊森沈寶幄挂流蘇北宮漫閱魚龍戲東絹頻臨蛺

蝶圖圖史紛披間珠翠深宮鎮日長無事鵲顧書從女史
傳鸞雛釵向昭儀賜昭儀明豔獨承懽促坐金牀倚笑看
燈簇九微長侍輦妝成七寶自凭闌闌前羅綺紛成列阿
監才人幾分別玉墀草細打毬高珠箔花深吹管徹景福
宮前細柳垂瓊軒不閉共追隨繡鐙纏髮嬌試馬綠綈隱
几倦彈棋春花秋月年華換掖庭寂寞腸堪斷素手繙書
教小王紅顏對食憐同伴自從羽檄擾秦川遂使官家少
晏眠五夜刺闈頻報警三春合殿罷開筵幾載天顏慘不
樂中宵獨坐占芒角礮火新開內教場詔書屢下文淵閣
閣門封事日紛紛督府幢關復覆軍幾部黃巾殘豫楚千
羣青犢下宣雲宣雲處處名城墮倒戈自啟居庸鎖闕下
交馳告急書殿前望斷平安火軍鋒倏忽逼神京一夜都

人已數驚內苑左貂羣揖盜團營飛騎半翻城城上弓刀
爭內向蒼黃無復蓬萊仗獨御金鞭視九門空願鐵券封
諸將白馬青袍捲地來君王長歎下平臺日詔內人從避
寇手持愛子共銜哀可憐十葉漢天子海竭山崩竟如此
複壁甯教伏后藏佩刀自刺清河死珠傷玉碎滿會城宮
車無那赤龍迎猶有黃門會殉主豈知紫闥竟屯兵自憐
白首深宮住欲問家山渺歸路潛脫霓裳出九重卻尋月
徑依雙樹一託香臺已十秋每談遺事自生愁室中漫禮
金仙席夢裏還隨玉輦游惆悵生年遘陽九戒珠持徧甘
衰朽仙家龍種尙飄零賤妾蛾眉亦何有我來故國幾沾
翰摩挲銅狄北風酸昭陽舊侍悲通德長樂姬人識佩蘭
從古存亡堪太息淒涼無處尋遺跡麥秀偏傷過客情柘

枝還下宮人泣

王雲明字聖能西華人順治丁酉舉人官黃安知縣有
習陽集

留別黃安父老

鄉思縈長夜天恩放老夫涓埃甯萬一鷗鳥且江湖猶憶
觸蠻鬪但憑牛馬呼衰顏休攬鏡壯志罷張弧琴鶴仍無
恙壺漿爨爨在途生還真似夢此別莫長吁既遇蒼鷹擊敢
云白璧誣諸君情自切三月政全無善守清時法勿忘舊
令迂可封期比戶握手暫躊躇

魏力仁字山公南樂人順治丁酉舉人官廬江知縣

登狼山

勝地名山壓海門山形迴合五狼蹲南瞻吳會江光白東

望扶桑日氣昏外府魚鹽增課稅不庭烏窟長兒孫清時
防禦勞宸算特遣嫖姚鎮大藩

張樞南和人順治丁酉舉人由教諭歷官國子監助教
仙井

百尺寒泉平地生高臺古木遶風清自從至正投符後雲
霧空濛鎖玉京

澧水

淼淼煙波入畫圖黃魚白鳥泛青蒲千家茅屋臨流水十
里香稻在鏡湖

李珪字鶴汀渠縣人順治丁酉舉人官甯德知縣有說
劍齋集

送王孝先入秦幕

江上相逢春草滿，橋邊送別暮禽鳴。
黃雲隴樹千峯隔，落日邊山一劍行。
漢時幾年猶置驛，秦關百里未休兵。
丈夫還有蒼生志，爲看陳琳草檄文。

任繩隗字青際，號植齋。宜興人。順治丁酉舉人。有直木齋集。

詩話青際，倚聲亦有名。與陳其年唱和最多。周旋於張西銘、尤展成之間。年輩頗高。

清明日游崑山

崑山一片石，巉秀稱奇絕。不使土附之，削膚僅存骨。捫蘿數十盤，宛轉踞其脊。流雲溼松杉，迴繞佛壇出。眼前無華嶽，此亦去天尺。所以慣遊人，不如乍來客。佳人飄縞帶，湘佩穿林陌。婉約故可憐，含淒况寒食。春風吹古道，芳草眠殘碣。車馬雖復喧，荒原自空碧。我能眞賞見，山靈不獨尋。

常寄游跡鐘聲日暮下鐙龕遲卻十年來面壁

上巳夜虎邱舟中社集卽席賦呈吳梅邨先生

上已由來紀勝游春深帶月共登舟詩從河嶽爭千古人是中原第一流錦纜似隨雙劍合玉簫還傍夜珠浮諸君視昔能無感風景依然晉代愁

今夕豈非良宴會關西江左共登壇

時涇陽武緯天星臨張公輔同在座

萬舸傳杯喚劍聚雙龍出匣寒酒到夜深生氣槩詩成水際得波瀾相看各有行藏意金馬何嘗卻釣竿

清明日繞道登俞山謁墓

看山不厭取途寬百折登臨欲上難石馬昔時增氣象豐碑今日念衣冠鶯愁落照嗚高樹磬逐歸雲下佛壇極目可憐惟灌莽爲誰禁火食猶寒

同人集曹叢臣致遠堂分韻得開字

城頭日落晚鐘催
寒夜陽春動地回
白髮自憐知己舊
青樽誰爲故人開
座中俠氣干霄上
牆外書聲度幕來
相勸莫辭金谷數
試看百罰有深杯

平原謁顏魯公祠

尙書遺像肅威神
瞻拜猶能起後人
萬里乾坤存正氣
七朝培植出宗臣
東藩指顧山河日
西向從容捧詔辰
老至愈堅薑桂性
生平大節在君親

李天馥字湘北號容齋永城籍合肥人順治戊戌進士
改庶吉士授檢討官至武英殿大學士兼吏部尙書
諡文定有容齋集

詩話王漁洋云容齋相國服闋入都其壬戌諸門生
已多通顯置酒新第讀學史胄司卽席賦詩曰郎君

館閣稱前輩弟子門牆半列卿蓋紀實也平生遭際
聖明陶寫風雅故其詩經緯史而皆以雍容淵秀
出之古詩排宕詰曲似少陵昌黎近體格律神韻俱
在王杜間其託辭近而寓意遠一唱三歎玉節金和
風灑乎盛世

古意

南望臨廣野見此山與河河水深以長高山復峩峩秋風
木葉下鴻雁當天過物象殊清迥憑弔憂思多雲樹不可
極我心勞如何

春日

端居寡營尙悠然澹心情百年感逆旅何爲勞吾生忽聞
春風至有酒急須傾醉卧東窗下階前一鳥鳴

退谷

偶隨泉聲行還逐泉聲止泉聲近不鳴清流石齒齒孤亭

俯層巖滿階紅葉委萬籟動笙竽嵐光生澗底秋氣入夕
佳微涼耽徙倚蓬瀛想金仙薜荔弔山鬼此地昔流觴高
會擬曲水我來悄無人空山落松子望遠資無窮念往情
何已兀兀碧檻前坐看溪雲起

廣應寺

在西山明內瑤
建後皆瑤墳

秋雲壓山山欲低山光倒瀉青琉璃遶麓松枝老龍怒奔
濤捲地風淒淒古殿陰森影金粟月黑深廊飛蝙蝠北接
荒原豕縱橫枯榛斷莽土花綠幽崖寂寞清露墮永夜虛
林生野火當日觀軍出使人賢愚魂魄空山鎖

送宋荔裳按察四川

前歲相逢廣陵道競渡初過君發早去年再遇芍藥開陳
榻同飲說巖寓同浮菖蒲杯君今出使復重五人生離合真奇

哉轉眼留連曾幾日赤靈朱勝傷俄乖多君客邸偏好客

自譜新詞駭鬼伯

在獄譜劇贈災人口

大第名園徵舊歡急管繁絃

度關夕間爲詩歌據上頭一時作者皆辟易王家兄弟

阮謂

亭昆

用火攻九辯君稱老折衝予亦弱冠爲長句結好輒

復慚山東方調琴樽頻過從詎爾洽蜀借文翁蜀道天上

九千里重江曲棧何窮已翼馬裁眉繡絡驕龍船灩澦牙

檣駛西陲按部外臺尊况復金躔稱俗美輭塵漠漠廣甯

門如雲供帳羅高軒男兒得意屈羣力朱輪綺蓋何翩翩

君到莫作巫山賦侈辯雄風驚峽雨長途願贈紀行詩知

君臨水登山處

重游西山

列岫參差出西風款段輕雲中看鶴影樹杪覓泉聲野曠

增鄉思山深冷宦情此君相別久蹤跡愧平生

送高念東少司寇

立朝無幾去安之信是先生素不羈自謂何妨行我法誰
能稍勸合時宜蠻中子舍歸偏早海上神山約未遲從此
祥刑成往事岱雲徠竹費相思

樓桑村懷古同說巖

衰草寒煙望裏孤樓桑遺跡未全燕帝鄉羞屬黃初歷王
氣猶延赤伏符國士風流成據蜀宗臣魚水失吞吳嘯鵲
舊恨蠶叢遠此地惟聞叫野烏

董岐卿侍讀參莫經略軍事經略卒于軍獨獲免歸

朝詩以慰之

誰使參軍度井陘無端左省罷談經下帷未及成繁露入

蜀偏驚落大星烏鼠烽高秋嶺綠魚鳧戰苦野燐青孟王
僭黨多降表回首連雲悔建瓴

野獵

羽騎參差小隊開黃雲城闕射生來光飛楊柳雕弧冷聲
徹林皋畫角哀曉日忽騰雙虎疾秋風斜掣一雕迴更思
逐逸前村去爲語琵琶莫浪催

九日公馭招游祖家園同芝麓先輩石臞阮亭玉隨

玉蚪賦

佳辰同作出郊游野菊香風到馬頭十里疏鐘空際落千
峯晴黛望中收煙寒林麓紅檣老霜滿鄉關白雁秋脫帽
狂吟驚少長好山載酒一淹留

送洪昉思南還

未薦深慙蚤見知，漢廷空羨騎郎貲。誰言此輩宜高束，不信斯人獨數奇。南國烽煙萱草夢，西陵雨雪竹枝詞。逢迎應有游閒遇，憶爾寒江繫楫時。

輓王西樵司勳

西樵有十笏草堂詩集

消息驚傳鵬賦成，悠悠天道意難平。不禁秋夜汎瀾淚，何限春明縞紵情。十笏縹緗空舊草，百年霜露又前生。觥船遽覺司勳夢，無復江湖載酒行。

終古斯人竟寂寥，山陽遠笛冷清宵。煙霞痼疾成長別，蘭茝歸來下大招。封禪鴻篇新恨杳，燃脂花史舊香消。應劉去後風流散，挂劍空悲墓道遙。

感懷

把酒閒吟祇自寬，小窗香爇意闌珊。明河未落雲生淺，華

露無聲月上寒禁地論思傷老大塞垣烽火悵艱難南樓
舊屬平津勝幾度臨風想治安

同說巖憩天甯寺浮圖贈點石上人

命侶尋幽白紙坊雙懸塔影訝奇光

此處一行耽細馬藤塔二影

蕪路坐愛枯禪薜荔牆一氣鴻濛連海嶽數株松柏閱隋
唐老僧都未知名姓何必城南意獨傷

喜聞秦蜀捷音同說巖賦

鳥道艱難阻碧雞孤城一片隴雲低綠林初保黃花谷赤
幟遙連白馬氏空壁雄風頻逐北護軍聲價又安西霓旌
光啟蠶叢路從此長鯨鬣水犀

熊賜履字敬修又字青嶽號愚齋孝感人順治戊戌進

士改庶吉士授檢討官至東閣大學士太子太保諡

文端有澡修堂集

詩話文端治宋五子之學見契景陵屢以正學宿學見喪當官獻替侃侃無所撓中爲同官所訕齟亦嘗被彈事集有感懷詩云愆伏恆無定陰晴不待猜螢流疑閃電蚊聚勝轟雷蓋卽此時作景陵諒其無他賜始終眷顧不以浮言動也澡修堂爲御書賜額卽以名集詩冲和雅合颯颯治世之音

臨臯漁人輓歌

先生家住團風裏
斧簪婆娑照江水
年年欸乃洞庭濱
信口吟成槎上史
泛泛蘭舟一葉飛
西風吹入潯陽涘
垂綸高挂洪塘鯨
投竿引出白溝鮪
滄溟何處不煙波
揚子磯頭舟可艤
抱甕丈人山下逢
開尊共話羲皇理
天地爲籠江海罟
涓渚嚴灘安足齒
何況菱菱上谷驕
飄然返樵麻溪汜
歸來不脫舊時蓑
一夕乘槎棄如屣
蘆花自白峯自青
七十年來夢泡耳
楚些一曲哀江頭
思君不見悲風起

雨夜懷人

寒宵苦獨酌憶汝復誰親爲念詩情冷應知道味真殘煙
籠野色細雨暗江春何日過桑牖花間共飲醇

春亭對雨柬于皇

草堂花意近風雨亂春晴修竹搖空冷殘梅入望清煙霞
本故物邱壑自多情鹿鹿胡爲者輸君學晚成

金山

十年思勝地此日試登臨海氣侵雲溼江光帶雨深宵堪
方外想粗了未來心倚檻頻恣眺陰風動客襟

焦山

人隱偏名地山靈轉姓焦偶然通帝座遂爾逼雲霄邱壑
風煙老江湖歲月遙我來尋古洞披石坐松巖

吳園六朝松

六朝銷廢盡剩此一株松石劈蒼根冷脂乾白蘚封團煙
巢鶴鶴老幹逼剗龍薄暮婆娑下清颺動遶鐘

陳廷敬字子端號說巖澤州人順治戊戌進士改庶吉
士授檢討官至文淵閣大學士兼吏部尚書諡文貞

有尊聞堂集

詩話文貞入翰林後頗負詩名有入家詩鈔之刻掌
院事時一日與王漁洋同入內殿聖祖命各賦詩
故集中有句云昔與王侍郎受詔並爲詩時王尙爲
戶部侍郎也其詩固難與漁洋並駕然亦具有根柢
不同
凡響

十五夜北山見過有懷孫吳二子

昔者與孫吳翫月城西亭蕭蕭天風來萬里搖青冥寒空
盪園魄驚鳥羣悲鳴明鐙曜曲房淥酒淒以清短歌易慊

東坡全集卷二十一
三
慨良時傷我情奄忽浮雲馳躑躅東南征光景不可駐奔
落如流星二子渺江湖芳顏坐凋零四海何寂寥獨處思
平生惟我與君子綢繆結至精遙夜命儔匹羽觴羅中庭
清淺河漢流金波正洽洽濡翰發妙製朱絃激新聲今日
不爲樂別後徒屏營

龍泉寺下院

日隱原上邨秋陰起桑柘杳杳隨煙鐘悠悠遠峯下境空
放梵長天迴飛雲瀉松門晚色靜碧草淨可藉風吹籬邊
花寒香正盈把薄游涉清曠所歷向瀟灑樂幽抵嗜芟味
道如啖蔗至人患有身矧復簪纓假息心同冥寥聊此繫
吾馬

梅花用坡公次李公擇韻

寒夜凜客心雞鳴車轂動節往如逝湍光景一玩弄頗愛
幽窗梅著花破嚴凍天公憐寂寞物能競喧闐飛霜點衣
裘風埃暗騶從我生樗散徒不材因自縱山澤賞四友竹
徑從二仲息景偃東岡獲享水石貢冷梅坼冰雪析析柯
屢重卧壓短檐日疏影雜禽哢有時但孤吟祇供樵廝諷
默想苦寒夜戚若念前痛光寵謝少俊鞍馬事上雍未招
羅浮魂驟牽春明夢何當十年計遶屋手漑種春風吹白
日羲馭不得鞚別後綺窗前何人鐙火共枝間挂桐花池
上蹲老鳳遙憶黃葉山誰掃青螺洞待我花下歸白酒釀
百瓮

憶樊川梅花用東坡松風亭梅花韻

半林喬木樊川邨數株梅花牽蔓魂媼娥靡曼不挂眼天

桃野杏爲狂昏一廬未安揚子宅五畝欲老香山園玉妃
鬢影露身手暗香冷豔來相温有時先生春睡美綺窗喚
起驚朝暎經寒故嘗卻羅幔避風勤與關柴門翻笑孤山
林處士擁衾對花花無言只今人去花寂寞誰憐落月閒
清尊

書湘北秋水漁父圖

吾聞瀟湘洞庭煙塵中滄洲不合容漁翁今之畫圖尙復
爾孤舟渺渺寒林東遠峯青冥水雲白秋樹蒼莽楓葉赤
草木曾無戰伐愁谿山欲老菰蘆客李生雅好江海奇張
颿鼓檝游何時且當結束事鞍馬與子射獵南山陔

城南黑龍潭寺西樓對酒歌

春殘龍尾橫斜道羸驂退食隨年少文書叢裏過東風欲

寫幽懷何處好天晴古陂南城南城陰水碧金沙潭是日
宿雨林景澹微波流影青於藍寺前野亭向冥冥狂飈吹
塵暗廖廓雜花紅蕊寒且禁幸不逢花悵零落亭中裊窈
西樓開遠煙空翠山光來羨陂波濤琉璃色漢江春酒蒲
桃醅直須對此銜金杯搥琴擊筑心徒哀蒼茫萬事渺如
昨幾度落日軒轅臺鳳兮栖栖不得意東山繡斧流言忌
古來賢聖亦復爾醉舞高歌吾老矣回頭笑謝新少年一
生羞爲時人憐

晚過楊編脩爾茂

驅車巷南來巷東寺西老樹斜陽紅黃葉到門落可數秋
色入眼庭華濃故人憐我心跡同開顏握手霜天空論文
細欲霏玉屑說劍壯可生雄風竟須瀟灑微官外休論艱

難萬事中感君義氣相裴回古來賢達甘塵埃蕭蕭易水
風增哀蔓草已沒黃金臺男兒在時得錢勤買醉不見古
人白骨纏蒼苔

贈韓少室山人

沁川先生嘗樂飢一生高視世不羈西崖古道蓬蒿齊小
亭晝閉春陰移我時徒步往見之顏色渥丹霜鬢滋年近
九十心膽竒大書灑墨光淋漓短札細字如毫絲方瞳炯
如熾電垂僊者縹緲高莫追浮邱洪厓世難知吾徒縮手
歸來時赤松黃石吁可師

菟耳山

馬上盧龍塞鴻邊菟耳山流雲無定日飛雨過重關古木
生空翠孤峯點細斑征途能暫息絕頂一躋攀

移居懷林澹亭

鬱鬱久居此天涯又卜鄰
秋花今別汝社燕並辭人
岑寂長愁地漂搖獨去身
偶因違咫尺轉益念交親

夏夜懷玉谿舊隱寄張靈璧四輔

三伏向盡朱火藏炎蒸未已愁
中腸流螢入簾故宛轉明
星照席何低昂琴書休夏年力
異藥餌經時歸與長焉得
清谿千尺水與君濯足臨滄浪

題寶腕畫

晚故推官雲
明先生子

摩詰遺詩畫意閒煙雲粉本有無間
風流一變添文采小
李將軍著色山

春蚓秋蛇蠶尾鉤家雞野鷺豈同儔
祇應落墨驚紈扇畫
作桓家烏牯牛

杜臻字肇余一字遇徐嘉興人順治戊戌進士改庶吉

士官至禮部尙書有經緯堂集煙霞集

詩話遇徐疆理東南有書紀其事國初一大政也告歸聖祖書煙霞者舊四字賜之歸田後遂以煙霞名集詩博大中時露奇懶之氣

經阜林驛

驛路桐川外林光轉岸容颿檣通楚甸秔稻問吳儂信喜軍書斷人歸草舍重揚舫冬日好何必更扶筇

虎門

羊城軍府壯虎寨水聲吞不有三門匯焉知百谷尊春波浮日月南斗豁乾坤設險金湯固綢繆報國恩

屠粹忠字純甫號芝巖鄞縣人順治戊戌進上山知縣官至兵部尙書有采芝堂詩

詩話芝巖宰封邱以遭河患城廬蕩盡前令率艤舟
河干蒞事芝巖至誅茅立官署置草舍棲流亡修築
城垣不兩月諸務畢舉在任十年以最遷禮科給事
中江南巡撫議題州縣外補芝巖疏言爵賞宜從中
出與時不合乞終養歸後補兵科遷工科都給事中
淮揚大水陳便民十要其甲戌服闋北上舟次瓜步
一詩極見性情

宿張道士山房

虛窗近好山山影窺窗隙藤穿古洞幽月過小橋窄放雨
一旗青堆雲半榻白老樹作人喧新蘿補天闕煨筍及烹
薇在在皆手澤禽到學書符啄木鳥也客來愁水厄意與石俱
閒詩隨花共發見我何殷殷云是歲星謫相訂赤城游霞
光起眉額夜夢入天台玉女共晨夕天台玉女
峯最勝

長嘯歌贈孫雪庵

蘇門先生善長嘯聲出丹田吐靈竅駢闐半嶺鼓吹喧縹

月山書院名二二二
三

紗中天鸞鳳叫海陵豪客云耳孫廣顙豐頤有奇抱三杯
耳熱意氣雄仰面蹙口聲轉洪初如幽溪瀉山溜漸如大
谷吼松風清如滄江鐵笛裂雲石肅如寒天哀角號霜空
烈如猛虎跑地山月黑壯如靈鼉掀浪海日紅悲如漸離
擊筑燕人慷慨泣市上慘如荆卿依柱秦帝辟易走宮中
好坐劍閣我眉凜冽淒清古雪吹空寒瑟瑟好踞泰山日
觀悠揚迢遞罡風響入秋冥冥幔亭峯頂使子騫太姥玉
管金簫千派歇洞庭湖口合湘如漢女銀箏錦瑟一時停
仙人猶然愛此聲何況我輩之凡情一嘯愁人能散鬱再
嘯醉客亦解醒三嘯灑灑塵心失四嘯飄飄道骨輕此聲
天授非人力開口欲學學不得豈是神丹絳雪調將毋眞
烝黃房植仙家有種甯偶然吾欲挾爾游八極嫌爾太肥

餓令瘠願爾兩腋一朝生羽翼

春暮山行

已惜春將去猶逢花亂飛
山疑人面熟鳥喚客愁歸
竹影侵雲淡溪流帶雨肥
何期沾背汗坐石解重衣

甲戌服闋北上舟次瓜步

飯後徐徐摩腹行舟中
淡淡覺心清潮因雨過添
流急帆爲囊空帶月輕
鄉夢已隨紅葉去餘哀猶
傍白雲生猜知客久沙鷗
熟旣去還來似有情

鄭重字山公建安人順治戊戌進士官至刑部侍郎有霞園詩草

秋夜宿南山白足軒

清夜疏林寂高吟度遠峯
月微兼冷露香燼又殘鐘
秋老

山容淡更寒蝶夢空孤鐙留信宿半榻白雲封

魏雙鳳字雖伯又字陽伯獲鹿人順治戊戌進士由知縣歷官宗人府宗正有南游草

補陀勝境

古寺倚山成雲霞院外生竹搖驚鳥語松響隱泉聲日午行將倦春殘雨復晴敲門僧未覺可是閉關情

趙崙字閔仙號叔公萊陽人順治戊戌進士歷官太常寺少卿有因樹屋集

詩話閔仙爲魯崙弟以事謫瀋陽卒戍所

金山

一柱砥中流三峯望裏收山光無地接塔影與波浮鷗鷺思依榻江潮欲上樓鐘聲何處是隔岸聽悠悠

井陘道中

夾道萬峯齊勞勞信馬蹏關連函谷北山入太行西積雨
征衣黯危巖客路迷瞻雲空有淚不敢憶幽棲

陳肇昌字扶昇號省齋黃岡人順治戊戌進士歷官順
天府尹有秋蓬詩南湖居士集

望是故鄉行次韻送毛子霞隱君歸郢

八尺昂藏一老子短棹蒼江弄煙水占盡風流賣盡癡手
挽頽波追正始倚馬曾飛羽檄文英雄原上悲殘壘千載
遭逢吏隱間轉瞬浮雲皆敝屣蘭芷出來楚澤多朝朝採
擷行還止海內聲華久識君相逢卻在武昌市晴川黃鶴
幾招邀載月傳箋興無比相如善病復多情白頭紅粉同
歡倚四壁蕭然不厭貧千金散去渾閒事朝來束書忽告

歸吳頭楚尾知何處笑指郢中是故鄉十幅蒲帆去若咫
聽雪樓中景物清錦瑟湘簾如畫裏只今赤日拂江長芳
草王孫行未已勸君緩棹待秋風一片青山何彼此

張貞生字幹臣號贊山廬陵人順治戊戌進士改庶吉

士授編修歷官侍講學士有王山遺響

詩話贊山夙嚴義利之辨家居構我師祠又舍宅爲
誠意書院康熙九年議遣大臣巡方贊山疏言擾民
無益以是擯級卒罷巡
方之議詩多真摯語

和友游定巖讀書巖諸勝

定光去後杖無蹤獨惹游人篆石宮磴絕連雲三徑別巖
虛漏月七情空書帷案潤窗前蹟甕牖橋成指上功代遠
傳聞多涉怪鉢孟信否可降龍

王遵訓字子循號信初西華人順治戊戌進士改庶吉

士官至戶部侍郎有餘清軒詩集

園居

爲客一何久歸來草樹荒誅茅開小徑刈棘補頽牆几裊
爐煙細園饒井曰涼卻憐十載事強半滯他方

林壑饒幽勝扶筇意自舒湖雲乘曉霽山樹入秋疏鳥立
沙邊艇人歸柳下廬但斟桑落酒何處問樵漁

蕭惟豫字介石號韓坡德州人順治戊戌進士改庶吉

士授編修歷官侍讀有但吟草

詩話韓坡少歷詞垣典試江西督學畿輔清望甚著
魏敏果以韓坡與陸清獻同薦韓坡因母老假歸遂
不復出時年方三十有三也其詩不屑屑字句以
求工而意到筆隨出於自然不煩繩削而自合

登清風臺謁夷齊廟

我立永豐巔首陽向我峙遂之清風臺以訪墨胎氏鬱鬱

松柏林悠悠灑漆水雨洗春色深人入清風裏未食蕨與
薇安知肉食鄙爲頑與爲廉百年同一死吁嗟黃虞人在
此不在彼

望南陽湖

縱目煙波千萬頃滿湖漁艇捕魚翁銀河半瀉山爲岸太
極初分氣作宮挽粟江淮通貢賦合流濟泗競朝宗八垓
汗漫游何日欲買扁舟住此中

旅店早發

荒村天未曉驚月入窗櫺問夜更將盡思歸人半醒橋頭
分野徑樹杪點疏星何事爲形役雞鳴馬上聽

夏日園中卽事

晨昏候母安此外便聾啞勝敗兩相忘以金注若瓦萬物

質非銅造化工如冶煩暑不入林園中避炎夏浮雲視豈
眞松風聽未假六月餘雨澤禾黍被原野二三素心人彈
琴敲碁者短服復散髮黃庭手常把高枕卧北窗陶潛吾
師也

杜鎮字子靜南宮人順治戊戌進士歷官翰林院侍讀
有寶田齋草

懷賈無染隱君

琴書邱壑自閒閒三十年前早閉關未擬陶潛居栗里眞
如安石卧東山秋風故國懸霜鬢夜月荒臺照旅顏指日
賦歸尋舊侶相期潁水鹿門間

王日高字北山荏平人順治戊戌進士改庶吉士授編
修歷官禮科都給事中有槐軒集

周櫟園曰北山詩
以風趣淡宕爲歸

昭慶寺小閣月夜

同是一輪月湖頭覺更明
雲隨風欲墮人與氣俱清
入目煙光闊澄心曉霧瑩
如何方鏡淨滓翳頓然生

吳伯成明府招飲秦園同留僊天士

天然山水地點染作名園
樹色干雲秀蛙聲過雨繁
看花時坐石待月更傾樽
我欲忘歸去桃源卽此村

于漣字清漪文登人順治戊戌進士歷官吏部郎中

秋日道中

左輔遙天塞雁過回看秋色近
如何豈因白髮高懷減偏
爲黃花客思多風雨薊門羞
老大夢魂衡宇滯關河干戈
聞道消吳楚不必登臨始放歌

戴王縉字紳黃號雲極滄州人順治戊戌進士官行人

司行人有蕭雲齋集

兩夜懷鄧孝威

憔悴何時已思君苦未休亂山殘樹影野水暮雲秋雨逐
江聲黑虹明夕照收何時重把袂清夢自悠悠

劉果字毅卿號木齋諸城人順治戊戌進士由推官歷

官江南提學道僉事有十柳堂詩集

詩話木齋爲青岑方伯兄康熙庚寅聖祖幸天津
青岑方官副使入對觀上作書因奏臣兄果昔官河
間知縣蒙詔褒以清廉愛民乞賜堂額上卽書清
愛堂賜之文清以書翰勒石號清愛堂帖以此

贈姜勉中昆仲

吳門風雨聽雞聲共被君家舊著名鼓瑟恥爲齊處士傳
經猶是魯諸生孝能繼志由天性淡以論交見古情一榻

東邦三阜帽幼安千載有同盟

容有問東武名勝者略舉示意

澄鑑沃淇白玉堆青峯插漢五蓮開春前花滿盧敖洞雨
後雲封蘇子臺夜半瑯琊先見日天晴潮汐晝聞雷李斯
古篆留清署爲記秦皇覽勝來

山家

略行橫施磴道偏稜稜石齒草芊芊溪寬樹影遙沈水雲
起山峯上接天塵世鶯花渾是夢煙霞雞犬盡疑仙亦知
大隱非容易欲向此中小結廬

高暉字元中號蒼巖襄陵人順治戊戌進士歷官蘇州
知府有慎游草新安近詠等集

哭胡敏公次桑楚執韻

廣陵散絕動哀吟孤幌疏風雨暗侵自痛文康埋碧玉誰
將賈島鑄黃金西州淚寄鵑曉盡東海魂歸鶴怨深嗚咽
不成懷舊賦獨挑殘焰夜沈沈

寄答桑楚執見懷

短髮空餘老大悲三年一讀故人詩竹間殘局完公事塞
外新編是宦資自笑子長牛馬走誰憐杜甫鳳皇飢何時
煮石青峯下共跨黃羊侶鹿皮

吳淇字伯其睢州人順治戊戌進士歷官鎮江同知有
雨蕉齋詩集

長安秋霽

薊門秋乍霽徙倚望長空橫日孤雲白先霜病葉紅水明
官道上礎亂客愁中矯首千山外南飛有塞鴻

宿西山桂香閣贈某道士

雲卧西山閣，煙松陰石扃。窗分江月白，檻受海潮青。嘖嘖棲花鳥，飛飛掠水螢。問君投宿處，此夜借茅亭。

舟次湖南

一官自歎迹如萍，萬里揚帆出洞庭。薄暮猶霑神女雨，垂邊漸見老人星。草連湖水愁中碧，煙鎖嶽峯望裏青。廟近黃陵休繫纜，冷風清瑟動湘靈。

林雲銘字西仲，侯官人。順治戊戌進士官徽州通判。有

挹奎樓集吳山穀音

詩話西仲古文折義楚辭燈莊子因韓文起流傳鄉塾瀕爲通儒所譏詩所作不多未足名家其在新安九年不調旋以汰冗裁缺歸耽逆之變入獄籍產事平始出獄晚居杭州所爲一拂祠記以呂惠卿與鄭俠相提並論足爲闕容解嘲矣。

登陴紀事

萬物當芻狗海波傳警息己亥夏六月蹂躪江南北官民不知兵相繼自頓踣延及宛與池聞風墮疆域新安失唇齒訛言相煽惑强者思走險弱者競逃匿我爲新安吏蒿目徒惻惻七月方上旬防兵反攻逼驍騎薄西城飛矢流如織空拳宿城頭有氣難吞賊海謀七人來詭辭誇戰克廿三抵郡內狼狽爲鬼域殲之演武場觀者無人色相挈避挑釁半城生荒棘叛兵拔營行所至掠新特更聞祁門令邑陷奔芳蔚萬山盡伏莽民心多反側紛紛羽書馳軍情何其亟議戰苦無兵議守憂無食書生何所能惟有死報國

白髮詞

星星白髮勸爾一杯酒誰不知壯盛後當衰朽何勞一莖
兩莖插標鬢右蟬蛸何歿冥靈何壽臭腐神奇迭爲尻首
相傳交股國東有不死民吾將解吾屣卜吾里傲殺人間
碌碌等閒穰秕任爾白如菅茅黑如秬秠我只不對鏡不
臨水本爲愁中生何事苦添愁夜游秉燭無須問莫使樽
空惜杖頭

客杭書懷

老去偏爲客病多不耐愁疎鐘千里夢淡月半牀秋羽檄
驚旁午家書絕致郵宵深眠未穩腸斷碧雲樓

建州古蹟

靜寄

寂寂荒陬好結茅煙霞不負舊時交參將水月無生話
筮得天山最上爻客少空懸孺子榻書多但擁放翁巢草元

有志終須就卻懶逢人說解嘲

重游新安

頻日緣溪箬繭船到來猶見舊山川
烽煙甫靖多空巷戎馬成羣雜市廛
鬢雪自憐前貌改晨星難得故人全
扶藜父老爭相問憶唱驪歌十二年

羅孫燿字乃遠順德人順治戊戌進士官都勻推官有石湖集

和劉倬之湖上

蘗嶼花源一釣磯相看終日坐忘機
寒空波影魚微動夕照林聲鳥盡歸
近處未能供茗具遠游猶及製山衣
知君笑我多疏放他日黃龍定是非

湖閣夜雨

溜瀉檐階鎖夕煙竹聲松響共蕭然一天雨掩閒吟閣半
夜風橫罷釣船花委暮林香漠漠草低寒砌色芊芊此心
不逐疏樵去好背孤燈便學禪

張一鶴字友鴻號忍齋婁縣人順治戊戌進士官雲南

推官有慎黔詩野廬集

詩話忍齋官慎時多與彭禹峯唱和合刻名慎黔二
客集兼工畫歸後以畫卷寄漁洋自題云別一山川
氣象更迢迢萬里不勝情歸來蕭瑟
餘詩卷畫得煙霞記遠行漁洋稱之

辰龍關

天地金湯險由來王氣鍾五丁開絕塞二酉抱神龍亂眼
奇峯過驚心暑瘴重興亡千古在立馬倚長松

懷人

西南諸國滇爲大六詔新開爻道平應憶松江蓴菜好卻

將老眼看昆明

別滇

十里壺漿送都言羨爾歸獨憐車下泣半是壑中饑日落
懷難盡交深淚不揮漸遙金碧地還整舊漁磯

侯體隨字從甫號記葉杞縣人順治戊戌進士官景甯

知縣有記葉集

同友人弔江淹墓

江淹富文藻夢花結思深所惜歷亂朝眾口甚鑠金賦成
恨與別生死友朋心更憶獄中書涕泗忽霑襟千載倏忽
度棘荆生古墓土黝草芽青東風吹老樹我攜良友來憐
慨悲其遇村劇奏嘈雜新碑鐫謬誤毋乃冢中人冷然嗤
而怒

鄒祇謨字訐士號程村武進人順治戊戌進士有遠志

齋集

折楊柳歌

美酒白玉壺高樹白頭烏壺空烏不去彈盡大秦珠

清河縣

客久歸程近鄉思益不禁春波高泗水暝色下淮陰漠漠
寒林樹蕭蕭枉渚禽黃河流不到禹德歎逾深

往嘉禾行鶯脰湖中

客游倦休憩孤帆乘蹻躡緒風薄千里泠泠桂楫間荇芰
發照耀黃柳媚清漣仰望碧雲合曠然知空山倒景不能
發餘暉生紅泉愁來憤方結理至累已捐滌蕩悅心耳杳
冥思神仙琴高騎赤鯉揮手隨芳煙波瀾虛曉月渺渺區

中緣去去謝湖水綢繆永勿諼

登爛柯山坐青霞洞天半日

清溪隔荒畚螺翠崢嶸起白塔與紅亭明滅蒼松裏石路
足盤紆磻流自瀾瀾拾級得間道悅聞洞天咫曠然通虛
明遼廓信可喜若無衆山橫坐矚見千里御風朝玉京浩
浩卻炎暑欲攜楸枰來縹緲問仙子便得青鸞乘但恐白
駒駛王質誠何人到今猶不死流傳好神怪此言無乃詭
不忍獨長生崎嶇尋石髓但當笑題詩再看碧桃藥

詠懷

舉世乏萱草平生苦寥寂東郭拉熊虎壯心思射獵西室
會名倡珠環生歎息相如工詞賦家徒四壁立君卿善遊
游五侯供飲食如何懷煩憂棄之遠行役攀翻桂樹間揮

霍椒邱側隱士已耆年教我佇顏色併望恩與讐逍遙謝
荆叢

中秋京邸

此夜中秋月清光十萬家吳歌閨隔院邊調入征笳北闕
橫秋色西山隱暮霞故園叢桂樹應發昔年花

魯紹連字可泰一字小秦山西籍貴溪人順治戊戌武
進士有魯小秦詩集

薊城

孤城如斗酌溪濱極望茫茫一黯神廢壘煙空樓白骨寒
蕪日落弔青燐何來越子三千甲只負田橫五百人豈有
桃源堪避世幾村煙水尙迷春

崖斷溪連轉碧蘿巖阿亦近列仙窩不聞歸鶴來華表但

有哀鴻泣尉羅山色故從愁處綠
野花偏傍戰場多亂流
滿目嗟何及空使英雄惜鬢髭

晚晴移詩匯卷二十八終